

永濟融禪師語錄

C40
4514
(232)

C 40-4514



B 64853

永濟融禪師住關東廣寧普慈寺語錄卷上

書記 師住
妙印 錄

師於順治庚子年自千山回廣寧時城守白護法領
衆檀越建雙峰禪院見魔黨嫉妒心欲力觝辛丑正
月八日城守領僧俗衆檀越請師於城裡普慈寺開
堂以證邪宗師在北鎮山興隆庵受帖進寺白護法
領僧俗送師入方丈畢請師陞座
師至座前云吾今懸古聖之寶鑑照諸魔形了也喝
一喝遂陞座拈香云此一瓣香祝延今上

支那

永濟融禪師語錄卷上

一換述
皇帝聖壽無疆恭願堯仁廣被齊日月之盛明湯德彌
新竝乾坤之永固次拈香云此一瓣香奉爲滿朝文
武一切大護法伏願長爲外護之紀綱永作皇家之
梁棟次拈香云此一瓣香奉爲現前廣寧城守白護
法及居士等伏願舉族享於百祥合府增乎善慶又
拈香云此一瓣香非從天降亦非地生採於無影樹
上囊藏久矣今日人天衆前拈出奉供先住嘉興府
秀水縣南湖如如堂上傳曹溪正脉第三十六世本
師介爲老和尚用酬法乳之恩乃就座上首白槌云
法筵龍象衆當觀第一義師拈拄杖卓一卓云驚天

動地也旣爾驚天動地汝四大天王天龍八部昔釋
迦如來曾在靈山付囑汝等護持佛法今波旬與佛
教而作障難汝等爲甚不護持乃呵呵云他方雲遊
二十年到處訪友慕高賢過了千山經萬水棍破皮
露鞋又穿須知予本無別意一心專爲要叅玄只因
昔年多辛苦今日方得至理圓休誇至理圓魔子聞
之起厭嫌何故孤非獅子類驢難比象肩時邪宗者
遂使一人名獨步領衆魔徒擁逼於座師以杖指云
無知之徒前白槌已卽當問話如何說法中而來擾
亂且容你試問看步問世尊拈花迦葉微笑卽不問

如何是法輪常轉師卓杖云會麼步無語師便打步
擬議師又打云立地死漢步曰問話爲甚打起來師
云豈不知吾臨濟門庭棒如雨點喝似雷奔汝來我
者裡作打會又連打數棒師復就座普說師說法畢
暴風哮吼衆服駭然普說另錄

住遼陽永安寺語錄

師於順治辛丑年秋在廣寧興隆庵受襄平郡城守
有倉耿居士及僧綱憫榮院王天宇居士等恭請住
永安寺

十月十五日結制陞座師云大清國裏無禪師禮拜

歸堂更莫疑阿呵堪笑河陽新婦子不如臨濟小
厮兒大衆且道何處不如他景雲覆遼海襄平轟霹
靂喝一喝下座

盛京談家庵赤崖禪師差監寺南宗大德領衆居士
設齋請師陞座拈香畢歛衣就座云臨濟建立黃檗
宗乘有普化克符二人成禡所以臨濟宗風名振天
下得二尊宿之力至今出吾遠孫從來擔板與人爲
怨無人成禡但有見影聞名無不憎嫌融道人見此
愚輩不識好惡更與矢上加尖乘一口純剛慧劍魔
也揮佛也揮聖也揮凡也揮物也揮空也揮只使一

切人上無佛道可成下無衆生可度纔稱融道人之
本懷若人會得歸家穩坐其或未然更疑到驢年便
下座

崔文登居士請上堂師云豈好合醬鹽好煮羹問汝
諸人是甚麼滋味出來道看有麼若無更聽山僧偈
云今有一事沒奈何飯籬邊餓死禪和二人設計中
紅心疑煞厨前小典座拈

德藏領衆尼善女請上堂師云一有多種二無兩般
鈎頭取則莫認定盤有麼復舉末山尼因灌溪問如
何是末山尼曰不露頂溪曰如何是末山主尼曰非

男女相溪喝曰何不變去尼曰不是神不是鬼變個
甚麼師云大小灌溪似將咫尺而量須彌末山尼雖
則善辨來音未能接得灌溪待他問如何是末山何
不只向道兔子喫牛奶尼曰不露頂師云露出了也
溪曰如何是末山主師云再犯不容尼曰非男女相
師云從何得者消息來溪曰何不變去師云孟八郎
漢又恁麼去也尼曰不是神不是鬼變個甚麼師云
汝恁麼三頭六臂太駭人生大衆山僧者等批判還
有檢點出的麼試檢點看若無山僧更與汝等頌出
頌云末山主非男女獨露堂堂見也麼靈光萬古世

界輝照破山河佛與魔

盛京觀音庵輝宗律王領衆檀越請上堂僧問擊破無明殼捉住這個獻在當堂憑師發落師云如何是你這個僧擬議師便打進云靈光從來透古今師云汝從何得者消息來僧復擬議師又打舉世尊臨入涅槃以手摩胸普告人天大衆云汝等諦觀吾紫磨金色之身瞻仰取足莫令後悔若言吾滅度非吾弟子若言吾不滅亦非吾弟子師云離此二途還有知釋迦如來落處者麼若有出來道看若無融道人與衆等頌出頌云推不出拽不入解脫門開何處立智

炬煌煌照大千空向雙林痛悲泣

廣祐寺長老領衆請上堂師云象王蹴蹋寶岩皆崩非驢所能獅子嘖呻狐精隱跡野干聞吼立地瀟尿祖師家風中下難湊衆中莫不還有勇猛上將疋馬單鎗出來戰一合者麼良久云出羣須是英靈漢敵勝還他獅子兒卓拄杖下座

保安寺監寺心宇領衆請上堂師云人困馬困未是困露柱之困始是困好於言下悟無生莫向言中尋尺寸還有悟無生者麼出來通個消息有麼良久云不知顏回何處去却令夫子淚漣漣卓拄杖下座

甘泉舖監院清風領衆請上堂云清風吹動釣魚舟
漁翁拋綸把釣竿順水推船人人易逆風把舵個個
難有甚難只爲渠儂人不濟遂以拄杖作拿舵勢歌
云這些白浪堆中任來去逍遙自在行此船却也太
平穩諸子快上休貪娛莫待船開悔後遲喝一喝下
座

守備常德安領衆請上堂云人道不通理復身還信
施大衆且道理作麼生通復拈起拄杖云拄杖子一
口吞却百億須彌盧百億四天下其中衆生不知不
覺無障無礙各作各事汝等曉得也未若還曉得說

甚還施日將斗金供養汝等也合消得其或未然只
恐滴水也難消他日後莫言山僧不道

因執事遭事亡盛京桂弘祖居士領衆設齋師陞座
云生涯如夢若浮雲活計都無絕六親半夜烏雞何
處去天明吞却玉麒麟良久云會麼若還會得鋤地
唱山歌也是一場大快活其或未然永安寺拋土撒
沙迷人眼內成翳只得舉頭見空花開口說寐語
再任永安禪寺語錄

師於康熙丙午年在廣寧福田寺受遼陽城守有倉
耿護法及本寺僧綱祖亮院王居士等恭請於十月

十八日結制開堂師至法座前云坐斷古佛路頭潛窟野狐妖恠任是須彌燈王也須速禮三拜喝一喝遂陞座拈香云此一瓣香祝延今上

皇帝陛下伏願龍圖永固鳳曆常新次拈香云此一瓣香奉爲城守耿護法洎闔州尊官伏願佳聲藹著善政日新恒作棟梁常居祿位次拈香云此一瓣香還知落處麼遇貴則價重娑婆遇賤分文不值欲隱彌露在晦愈明昔在人天衆前也曾拈出今衆中恐有未知氣息者不免重新說破奉爲先住嘉興府秀水縣南湖如如堂上傅曹溪正脉本師介爲老和尚用

酬法乳雖然恩大難酬聊表化儀乃就座上首白拈云法筵龍象衆當觀第一義師拈拄杖云臨濟下兒孫三要四王賓擬議攔腮掌誰敢續祖燈衆中莫還有不惜性命的漢出來與山僧拄杖子相見有麼乃云出羣須是英靈漢敵勝還他獅子兒謝詞不錄復舉歸宗會下有一僧夜中大叫我悟了我悟了天曉宗云夜間大悟的僧出來其僧便出宗云你見個甚麼道理便言大悟僧云師姑元是女兒做宗頷之師云山僧則不然待他云師姑元是女兒做便向他道諦當諦當甚諦當敢保未徹在待他眼目定動卽連

棒打出何故免得者僧墮在悟坑沉於死水

盛京汪僧錄苗道錄暨衆居士請上堂師云太阿橫
按截萬機於掌握之中寶鑑當臺現羣像於無心之
表有緣卽應故問答以縱橫不令而行乃言像而罕
測影響之士何足云哉復舉世尊臨涅槃時文殊請
佛再轉法輪世尊咄云吾住世四十九年未嘗說一
字汝請吾再轉法輪是吾曾轉法輪邪師云佛語真
實寧可說龜有毛兔有角不可說佛言有二既然如
是佛言四十九年未嘗說一字現在經一藏律一藏
論一藏流徧天上人間從何得來若言是佛說卽爲

謗佛若言不是佛說卽爲毀法見前大眾離此二過
請說說看若還說得分曉說甚世尊涅槃我許此人
親見釋迦文佛其或未然山僧只得下個註脚乃云
不是江湖客休入洪波裏下座

萬壽寺當家大亮同馬祖俊領衆請上堂師云道源
不遠性海非遙但向已求莫從外覓衆位會麼復云
含元殿上更覓常安慈氏宮中休問內院下座

鵝房韓景壽領衆請上堂師云設使言前薦得猶是
滯殼迷封縱饒句下精通未免觸途狂見只須坐斷
毘盧不存几聖而後性海揚波平地震雷猶較些子

其或未然總是點額之類也卓拄杖下座
觀音庵當家普庵領衆請上堂師云從上諸聖見人
樂着塵勞不求出離遂生憐憫之心告之曰汝等衆
生重貪嗔癡隨聲逐色與生死海內而無了期大衆
好語言還慚愧麼諸聖恁麼道雖然如是已是打開
布袋不能折合得山僧今日倒底傾出有人得者永
息希求拈拄杖卓一下云此不是聲汝等尋常作麼
生隨舉起拄杖云此不是色汝等尋常作麼生逐若
能隨逐元無繫縛便是世上了達之人會麼不解審
思量只道求佛難

地藏庵比丘尼德藏領衆請上堂師云虛名虛相谷
音鑑像棄而不修豈明幻妄少不努力老矣惆悵靜
以思之隨機稱量且道量作麼生稱描不成兮画不
就讚不及兮休生受本來面目無覆藏世界壞時渠
不朽

張性樂同衆居士請上堂師云正宗淡泊異道崢嶸
達磨大師所傳心印看看垂地也衆中還有見達磨
大師者麼若有見者方解承當若有承當者山僧卽
兩手分付有麼有麼復云百丈若無雙耳聾臨濟怎
解領三頓盡將業識作流傳此道今人棄如糞卓拄

杖下座

李似明居士領衆請上堂師云有時恁麼也得不恁麼也得恁麼不恁麼總得有時恁麼也不得不恁麼也不得恁麼不恁麼總不得衆位到此合作麼生卽是復云掀翻地軸乾坤窄撥轉天輪宇宙寬須向強中呈好手虛空打破劫初看

蓮花寺志心領衆請上堂師云顛明心卽佛陡覺海非鹹善財樓閣路日進丹霄步凡夫云未然我道常披露會麼擬心一絲對面千里下座

觀音閣當家秀字領衆請上堂云山僧有時着玆御服居獅子座諸人見道是富貴長者之身有時着弊垢之衣跨出糞箕諸人盡道貧士之軀有時不着玆御不居獅子座不穿弊衣不跨糞箕諸人到此喚作甚麼卽得復云彌勒真彌勒分身百千億時時示時人時人皆不識拈拄杖云還識麼千個萬個但識取者個擲下拄杖下座

冬至上堂僧問請問和尚身爲幻體培爐燒香必定是甚麼師云雪覆喬林同一色進云檀香半點終有益未知如來聞不聞師云你且道聞不聞進云滿空雲霧雪花墜師云罕逢穿耳客多遇刻舟人便打問

和尚慈悲爲衆個海內尋針我今拾得獻與師尊
師云癡人休說夢進云捨身入正道信卽是佛心師
云只管閑打哄乃云可笑千年事能將一念通相逢
禪客問細細話吾宗鐵樹開花千萬朶石頭抽笋兩
三莖泥塑金剛開口笑今朝冬至一陽生拽拄杖下
座

是日下雪

繳水樓師德領衆請上堂師云迷者迷悟悟者悟迷
迷悟同體悟者方知迷南爲北實情取則北本是南
悟無移忒返就迷緣莫得來處若了其心開佛知見
都無斯事如其未然則有五旃陀羅與汝共住一窟

常相謀害汝等有四惡蛇同汝共居常相吞噉汝等
有黑暗無明燭常相照逐汝等有三猛毒常相驅逼
汝等有伴黨六賊常相劫掠汝等法財珠寶汝等從
今省悟秉智慧劍發堅固志斬却魔軍輩安泰湛如
蘇且道安泰後如何是非海裏橫身入豺虎羣中自
在行

千山衆當家同谷居士請上堂師云混不得類不齊
六爻宛轉見重離夜溪下視千山白不是其中人不
知衆位且道如何方知犀因玩月紋生角象被雷驚
花入牙下座

蘇陀董如德劉中原領衆請上堂僧問人人有個生緣生緣在甚麼處師云有星皆拱北進云浩浩空中月新新一片紅師云汝脚跟下事又作麼生僧無語師便打乃云木伎機石女兒三冬陽氣勝六月降雪時有語非干舌無言切要詞會我最後句出世少人知且道作麼生是最後句聲分明記取下座

新城徐明好領衆請上堂師云心光虛映體絕偏圓金波匝動寂常禪念起念滅不用止絕任運滔滔何會起滅起滅寂滅現大迦葉坐臥經行未曾間歇會麼復云明鏡當臺照不差短長好醜盡歸家山河

大地渾如故不妨隨處玩烟霞

王大人屯宿邦傑周有選領衆請上堂師云無上妙道眼不可見耳不可聞非見非聞宛爾見聞見色聞聲脫出根塵水月鏡像夢幻施陳汝等曉得其中義也未此是如來清淨心要宜須決擇不可等閑光景流遷動如飛箭浮世如此人生幾何時不待人切須努力下座

臘八日黃魁居士領衆請上堂僧問父母未生已前本來面目迷霧不知請和尚分割師云徧界不覆藏進云日月照乾坤師云日月照乾坤與你分中有甚

交涉僧無語師便打乃云今朝臘八明星出時悟釋
迦嘆言竒哉一切衆生具有如來智慧德相但以妄
想執着不能證得今問汝等阿那個是如來智慧德
相汝等又還了得妄想也未若未了得切莫瞌睡也
須着些精彩分曉一分曉始得又如來智慧德相不
遠乎人人自遠耳大道微妙存不可見亡兮對面匪
存匪亡森羅自現心外無法法外無心心法齊照境
智甚深心亡照滅境智同歇一道通同十方俱攝還
有到者個田地者麼復云四海風清煙浪靜碧天無
際水無垠可憐業識忙忙者蹉過如來正法輪

慈航寺闍然欣停領衆請上堂師云眞實到家之者
得意忘言伶俦在外之人隨情起解情解旣起名相
是興言意兩忘十方咸暢還知咸暢的事麼乃云十
方世界永安寺大地山河是學徒隨順衆緣成解脫
看來全不費工夫下座

千山龍泉寺超玉領衆請上堂師云宗乘一舉古路
縱橫若爲措足苟非知方俊眼出格作者含冤上機
舉一明三豈同流浪所以一句語中具三玄門一玄
中具三要有縱有奪有殺有活照用臨時汝等大衆
到此作麼生會復云家山指出路非遙萬仞嵯峨挿

碧霄一片白雲橫谷口幾多歸鳥盡迷巢下座

徐公堡今進舒尚好領衆請上堂師云淘金豈假披沙得石觸波瀾猶費力露柱三更忽放光此時未審何人識遂拈拂子示衆云大衆還見麼若見見個甚麼若見個拂子正是凡夫見若言不見此是拂子如何說個不見的道理衆人到此須自忖量不可輕心取於流轉誠非小事實在悟明且道悟明的事作麼生處處綠楊堪繫馬家家門口透長安

廣佑寺住持法海領衆請上堂師云昔祇園須菩提問世尊云何應住世尊答云胎生卵生濕生化生有

色無色有想無想等皆令入無餘涅槃而滅度之而實無有一衆生實滅度者還會得麼三界實無絲毫生滅動靜之相皆由迷此決定惑爲色身之內迷俗稱爲我邪徒喚作神是我何曾我言神豈是神人生須特達乃拈拄杖云丈六紫金身也不屈着你下座元旦上堂師云一句爲君傳今朝是大年汝若入此門不直半文錢半文錢不直萬國競爭觀所以向子說大道體最寬還知得麼途中多少尋春客悞聽黃鸝作杜鵑下座

泰寧寺性德領衆請上堂師云循言執滯病在見聞

杜口藏形過歸傍認欲得決求大寶莫作小商撒手
懸崖當空便擲百千三昧豈在外求若認語言卽名
邪解至音絕韻妙曲非聲旣然絕韻非聲衆位到此
作麼生會復云無星秤子兩頭平提起應須見得明
若向個中分觔兩知渠錯認定盤星

萬壽寺祖旺崔文登王自臺張文禮設齋請上堂因
事乃云古人道祖師不西來少林有妙訣大衆還理
會得麼若理會不出切記努力前進真參實悟始得
不可掠虛近時有等影響之流前後覺觸見人請益
知識掠得來些言語出入遊戲不究竟真實大事止

認個識神到處掠虛古人喚作弄精魂弄猢猻他日
後閻老子鐵棒豈肯放過汝等果爲已事切記真實
但能情亡理喪計盡途窮無施設處用心正是你做
工夫處只到懸崖撒手死中得活絕後再甦通古徹
今一一從自胸中流出與麼蓋天蓋地去豈不俊哉
若不到者個田地誤墮影響時流中也跟着認識神
弄精魂牽猢猻牽來弄去弄到臘月三十日精魂散
了猢猻走了黑面老子算帳喫鐵棒時莫言山僧不
道切記鄭重

元宵日井兒屯居士王信安領衆請上堂師云文殊

寶刹觀音普門周羅法界唯子一人身土交映妙絕
凡聖本有天真非病不病長歌且唱妙舞更誇妙舞
則可更作麼生誇復云塗盃怪樣也奇哉神頭鬼面
舞三台千千萬萬人窺看唳仔細不知誰見來

坤寧庵寬智王國良請上堂師云打動永安鼓喚起
鐵餒餒請君一咬破山僧豈相賺古人曾得力滋味
今不減若也不奈何好個鐵餒餒還咬嚼得麼復云
提起須彌第一槌電光石火太遲遲象王行處狐踪
絕獅子跑吼百獸危

解制上堂師云尊者憍陳如九旬最親切老少幸相
依上下皆歡悅且道歡悅事作麼生鴻鵠一舉千里
飛鑽雲鷄子與天齊鳳凰不是凡間物爲瑞爲祥自
有時下座

福田寺師誕日上堂乃云撈漉愛河之弱子常行般
若之慈舟專設最上之妙藥恒懷周濟愈方休復舉
古德有僧問云和尚高壽德云老僧與太虛空同庚
師云福田則不然若有人問和尚高壽直向他道虛
空是吾弟子乃是長兄若要討端的問取太虛空且
道與古人相去多少便下座

蓋州一花五公爲薦考妣請陞座座主似也問葉居

士請和尚上堂是何意旨師云專爲超薦也喝師便打也云一棒落在甚處師云量你不知痛癢又打進云一聲喝出黑牛尾師云着乃云無邊刹海自他不隔一毫端十世古今始終不離於當念所以由心生故種種法生由心滅故種種法滅既然如是一花五公今請山僧陞寶花座顯揚大法演最上乘薦先考妣從周葉居士竝於高氏且道卽今從周高氏生也滅也還有知落處者麼若有知者也許此人具一隻眼其或未然山僧只得重復舉示大眾從周高氏仗孝子五公一念至誠之心天宮佛土隨願往生此土

他方逍遙自在得如意解脫證如意安樂旣仗五公得解脫證安樂且道五公又承阿誰恩力不見道靈丹一粒點鐵成金至理一言轉凡成聖衆位還要會至理一言麼分明記取卓拄杖下座

附閻山大觀音閣結制掛鐘板

師掛板畢拈槌云木闍黎木闍黎從來你與衆人助揚發機閻山今日不圖汝鼓舞揚聲貴要你宗風不墜大眾且道如何便得宗風不墜遂擊板云若將耳聽終難會眼處聞聲是始真

附齋單

肩擔石貳腰纏八斗費力不少百丈打破醬甕是何
心行若還會得坐食無米飯渴飲趙州茶其或未然
飯籬邊餓煞怪融道人不得

又

堆山積嶽來盡塵埃虎驟龍驤徹底掀翻永安只得
打開寶藏庫滿盤托出鐵饅頭從教豎咬橫吞栗棘
蓬任意加食一個個飽齁齁地東倒西歪猶較懶融
百步

小叅

師云我此宗門祇論證悟不論會解若是爲生死底
人須求親證若是人我叅學之徒只求解會到處覓
相似語句遞相印證已後教壞好人家兒女我此門
中都無斯事伏惟珍重

小叅云趙州道個洗鉢盂去其僧齧爾知歸鳥窠吹
起布毛侍者當下得旨爲復就伊明破爲復吐露向
伊亦不是就伊明破亦不是吐露向伊汝等還會得
麼本有之性爲甚不會他爲甚者等容易汝等爲甚
者等難不是向無信力必爾業惑海深須要具大慚
愧起大信力發大志氣但辦肯心必不相賺玉堂有
路通人到金榜無名只自慚下座

師住觀音院因事退院小叅云惡世道魔強法力難調治罪福罔不明因果撥無忌我此選佛場化爲羅又聚不停向奔波爲是癡騃的闍山實俊哉非是道德衰豈不知明珠五百顆歷劫受殃災唵莫道佛法無靈驗因果影響迅若雷

後監院卒也

廣寧福田寺建禪堂完又師誕日錦城弟子上廣寧路值溪河瀑漲衆有二人沉沒水中幸無恙得爲小叅云一枝修竹建精藍風捲蟪蛄入海南惡水潑來成第二鈍根蹉過問前三復云吾錦城弟子年年不顧炎熱流蒸蚊虻熾盛而來今年更不相同時值大雨淋淋江河瀑漲洪水滔滔不顧危險不惜身命一往直渡吾乃無一法與人叅須自叅悟須自悟來無所益何苦如是雖然信爲道原功德毋長養一切諸善根卓拄杖下座

師庚子年遊千山回廣寧城守白護法及衆居士闍山建雙峰禪院上梁師拈拄杖指梁云歷遍乾坤無處尋偶然來住此幽林羣峰排列雲霄碧蘚徑斜過草木深蒼松怪石無人識古樹垂陰衆目森若果地靈真有應兒孫千載法雷音遂起上梁住雙塔寺入院

佛殿云夫如來者天中之天聖中之聖若有見者須當參禮且道山僧分上又作麼生太虛寥廓塵埃淨智鑑圓明物像殊遂展拜

東塔隋建雙圖種佛因人傑地靈瑞色新衆僧檀越爲古刹今日堪添一主人遂上香

西塔水流東西雲起南北妙用透出乾坤外誰信佛祖境界寬

監齋顯露處逼塞虛空隱密處踪跡難尋隨處稱尊紅塵裡廣作神威護梵林

方丈踞此室行此令且道此令作麼生行喝一喝云兵隨印轉將逐符行

因事卽退雙塔院事吾乃政教過闌東慙勤爲人幾沒功林中內藏奸賊佞佛祖宗風何以弘

垂問

旣是永安常住爲甚終日家鬧轟轟的

永安門前路往復行大步中間一塊磚諸仁者爲甚蹋不着

旣然雪覆千山爲甚孤峰不一色

落堂

師云喚作拄杖子則觸汝等喚作甚麼一僧進前擬

奪拄杖師云喚作山河大地則觸不喚作山河大地則背汝又作麼生僧遶一匝師云是則似似則未是僧無語

入室機緣

一僧纔入師云如何是你未生已前本來面目僧喝師云者一喝落在什麼處僧無語師便打

又一僧入師云一切衆生皆有佛性如何是你的佛性僧曰無師云無且置道無的又喚甚麼僧無語師便棒

又僧入師云道看僧云飯是米做的師云飯是米做

且置向未生已前道一句僧擬議師打云爲甚不會又僧入師云如何是你本來面目僧云白棋盤師云那裏學得者虛頭來僧便出師云放汝三十棒

又僧入師舉起香板云向這裡道句看僧噓一噓師云學者虛頭來僧擬議師震威一喝

又僧入師云道看僧云千萬歸一師云一歸何處僧無語師便打

又僧入師云如何是汝本來面目僧云風刮不着師云更道看僧無語師便棒

勘辨機緣

撰述
師在清江浦檀度寺有二道士與僧論玉皇大帝大過於佛其僧疑惑師向士云爲甚麼殿裡佛坐梵王玉皇兩傍而立士云我說經中所言師云你還聞漢時白馬寺焚經之事麼有一道士姓杜名光庭所造之書皆杜撰汝曾聞否士茫然師責云汝却將升斗量大海其當乎道士愧然而去

師在都門普濟庵有付帕子二僧到菴欲難問方丈先至師寮問同寮僧東寺拜大悲懺見好相有否寮僧云不知僧云汝先在彼爲甚不知師云縱有不好向人說二僧云好事怎說不得師云汝當好事文殊現像文喜擊之爲何也僧云有幾個是文喜師云汝稱宗教俱通經云凡所有相皆是虛妄你如何講僧無語師云魔來若着卽魔眷屬僧云聖魔現相有真有假師云魔來現相汝作麼生分辨僧又無語師云經中又道若以色見聲求是行邪道你如何會二僧總無語師云汝等全不通曉焉敢講法二僧抱愧而去寮僧復舉似方丈和尚尚笑云兩句經尚不知分曉說甚麼宗是打假旗號的今日遇着真滿州也師至河東謁國子公公問南泉斬猫就是恁麼斬了爲別有意師云令不虛行公大悅

張巡撫一日到永安寺設齋問師釋教儒教總一理
師云大護法如何見得是一理曰總不越乎思師云
你道思從何來曰思從心起師云心是何物思從心
起張點首曰者就不知師云不知却親切張大喜
自讚
慣說木札禪恒做生鐵漢幾翻親自走江南曾向祇
園閒打算阿呵呵見不見今古令人皆不識永安寺
踞汝獨判

永濟融禪師任遼陽永安寺語錄卷下

普說
書記 師印
照德 錄

師云堂堂意氣走雷霆凜凜威嚴掃邪宗巨靈擡手
無多子劈破華山千萬重還會麼若還會得山僧便
下座其或未然更爲饒舌叅須真叅悟須寔悟汝等
切莫學邪徒而隨下流永安寺裡論實不論虛人皆
謂永安執古非永安專意好執古觀今人不及古之
人遠矣豈不思古人爲萬世之標榜也昔汾陽禪師

歷叅七十餘員知識後到首山因問百丈捲席方大悟而遊衡湘每爲郡守以名刹致請乃曰吾傳佛心印非細事也前後八請堅臥不答洎首山歿後西河道俗遣僧契聰迎請住持師閉關高枕聰排闥而入讓之曰佛法大事靖退小節風穴懼應識憂宗旨墜滅幸而有先師先師已棄世汝有力擔荷如來大法者今何時也而欲安眠哉汾叟起握聰手曰非公不聞此語趣辦嚴吾行矣遂出世住持時慈明在衆叅禪但有昏沉引錐自刺云古人爲法忘軀我何人也焉敢放意汾州在河東地苦寒冷立者往往足指凍

裂師因罷夜叅一日宴坐有異僧仗錫乘雲而至問曰和尚何故罷夜叅師答以苦寒之故僧云和尚會下有六人成大器願勿惜法施也言訖乘雲而去師明日陞座云胡僧金錫光爲法到汾陽六人成大器勸請爲宣揚自此夜叅你看他父子是千古之榜樣也今人去聖時遙一代不如一代吾崇禎九年到南方見曾祖密老和尚白棒掀天中興臨濟之道叅玄之士望風而至自密祖棄世又遇時荒人窮智短而被利名心牽動深可嘆也自從禹革以來法門大變徃徃見住大院子老凍農不以法門爲重端喜白臉

書生遇便東瓜印子亂搭教他拈古頌古又教讀儒書好相與士大夫圖門庭熱勝又不識廉恥而返誇我有好門徒令無知晚進空腹高心起大我慢未證謂證未得謂得認着驢鞍橋當阿爺下領指鹿爲馬喚鐘作甕却將世間閑學解等閒埋沒祖師心正所謂一盲引衆盲相牽入火坑者是也若以聰明爲是而世上科甲舉貢喚作悟道人得麼若以聰明當是者昔五祖會下七百高僧神秀大師是七百人教授師又是舊家更兼廣學爲甚不傳衣鉢續祖位也盧行者是個戴髮俗人又目不識丁而得衣鉢須知古

人端以續佛慧命爲切要貴圖佛種不斷豈同凡夫業識心動而塵勞先起造三途因結無間果融道人這等說話如有旁不肖的出來道你有甚長處便恁麼道融固無長處少福闕學惟有一味真寔余十九出家二十行脚至愍忠寺受戒後親覲蓮宗靜王學叅禪領個念佛是誰的話頭往房山縣上方山龍虎嶠住靜將此話頭晝夜叅直得東西不辨南北不分一日覩水溝蠓虫有個人處後往南方叅衆知識多蒙印証者奈自不肯揮人天重擔更到叢林中作務近見無知之徒道尚未曾夢着狂稱其悟而詐現

知識之相憍倨自若魔氣所中生壞法之端此不肖之輩痛可惜焉余思欲退隱故轉都門息普濟菴復值本師介老和尚至京普濟請開堂正所謂不是冤家不聚頭固爾受其付囑往京東欲圖接得一個半個他日將報佛祖深恩亦報本師和尚之恩不想所到之處鬼魅爲林狐精遍地愚癡僧俗皂白不分真假未辨但見粧模作樣便禰和尚不知是人鬼豈曉佛耶魔耶而無尊無卑無父無子混成一團此邪見橫行於世正法輪摧毀謗隨和力欲擯逐不幸先聖晏駕而山僧心念休戚情隱山谷甘作一病叟

耳忽浙中天目山來一禪師數千里相訪諫曰遼陽僧俗請和尚所爲何事永安現有百五十大衆未見請益做工夫者是大衆懶耶和尚法恪也余曰滿河堅冰一杓之沸焉能化乎禪師云雖是這等和尚還要慈悲爲衆余然此事無一向固思古有一尊宿住於空寺向無學徒宿設方便至開堂日爲泥羅漢說法所以道出常情非同比類汝等若木石乎衆聞此個個喜勇精進立志叅禪賴此禪師一往大衆且道喜伊是惱伊是良久云珊瑚枕上兩行淚半是思君半恨君卓拄杖下座

爲狂生普說師云要識真金須入火再三煅煉見精
麤上行買賣不饒讓好物從來價自殊衆位且道山
僧作的是甚買賣蕭蕭蘆葦映江流獨棹孤蓬漾小
舟細雨斜風渾不顧一心只在釣竿頭垂絲千尺意
在得魚所貴者適意之錦鱗所重者鯨鯢之魚王若
是鰕蟹蝦蟇只一跳而已矣豈能興波作浪震雷行
雨三草二木難望潤澤有其用處所以我此門中難
得者千個萬個難得一個昔日靈山會上四十九年
說不盡末後付飲光邈多度人籌盈滿室惟許童子
悟道少林面壁九年獨允慧可黃梅七百高僧單付

搗碓行者山僧歸遼東以來十有餘載未曾得半個
英靈衲子近日遇一可笑之事有一書生自稱鐵頑
欲將斗杓以量東海擬扶杖而度須彌山僧一見愚
狂固不理爾生隨處誇口謂山僧無言可對今向人
天衆前判此愚昧之徒山僧不採爾者誠惜千斤之
弩不爲鼯鼠發機連城之壁焉與瓦礫相觸余固知
爾乃折錐探地漏屋窺天折錐探地焉知地之淺深
爾謂淺地地豈淺哉漏屋窺天焉知天之大小爾謂
小天天豈小哉爾鐵頑不過井底之蛙管中見豹耳
然又似螳螂怒其臂以當其轍吾乃七竇大車豈因

螳螂之臂而不運進耶是不可也故就爾號鐵頑論之鐵也者卽頑鈍之物也頑也者乃無知愚癡之輩也余固知爾不勝矣又焉知吾宗教外別傳不立文字之旨所以道吾宗無語句亦無一法與人縱有一言半句義在言外須向言外會取名爲格外提持爾鐵頑韓盧逐塊何曾會意吾乃問堂衆既是永安常住爲甚終日鬧轟轟地汝言有人語不是永安常住問爾鐵頑不喚作永安常住汝喚作什麼爾便意謂是店房爾還知店房中事麼若不知是妄言爾言向鬧裡求靜亦是妄言吾道那伽常在定無有不定時

山僧又常說金波匝匝動寂常禪吾問衆道永安門前路往復行大步中間一塊磚諸仁者爲甚蹋不着頑言眼前就是可惜無人拈來打破據汝亂道妄言豈曉旨趣吾示意言外非是窑燒之磚汝錯解妄謂拈來打破吾又示衆問雪覆千山爲甚孤峰不一色頑又謂牧童本是放牛子怎奈面目不相同吾謂汝何曾識得牛來牛尚不識焉曉牧童且爲汝說明牧牛之義昨夜三更前鐵牛耕遍田喫盡三春草吐氣在青天也無欄也無圈前山後山任方便牧牛童正憨眠坐斷毘盧世界寬自是牧童眼皮重汝又言若

招述
一六
有好漢知道這永安常任是借歇店房我道這店房也開得起何故草足料足槽道方便事奉者慇勤只奈汝愚徒不知我者商賈所販何物我若不說汝却不知吾祖白玉琢成泥彈子黃金鑄就鐵崑崙千年滯貨無人買未免如今累兒孫汝又言從熱鬧場中獨自冷冷清清這個磚頭也踢得着問汝鐵頑你畢竟將甚麼喚作磚我若不說你驢年未夢見在我所謂盡十方世界是個永安常任一切有情心地是一塊磚若人悟得行也在上行立也在上立坐也在上坐臥也在上臥步步不離從上諸聖得此事者莫不

統三界而攝四生號令人天扶顛極濟亦非分外頑又言這個孤峰也學得來山僧道設使言前薦得猶是滯殼密封縱饒句下精通未免觸途狂見不墮二種離四句絕百非試問汝鐵頑作麼生學汝又言有聲有色還易得無色無聲始爲難山僧道有色有聲是增添謗乃是常見之邪徒無色無聲是滅減謗亦是斷見之邪徒汝鐵頑敢言是麼是麼山僧道未在前未在前有可汝實不知謗法之懋懋中有一比丘雖持禁戒一言謗法八十一劫墮阿鼻地獄李鐵頑是何人焉敢謗法乎若要招無間業莫謗如來正

法輪大衆久立伏惟珍重

茶話

除歲云歲去換愁年春來物色鮮山花夾綠水巖樹舞青烟個個不可惱大家須喜歡喜歡則不無茶果價且止倘有人問汝等要飯錢時又作麼生遂云歸堂去

曹溪水趙州茶金牛飯雲門餅永安寺裡鐵饅頭咬得永安寺裡鐵饅頭方解吞得雲門餅吞得雲門餅方曉喫金牛飯飲趙州茶沾曹溪水且道永安寺裡鐵饅頭作麼生下口縱然咬得着更問汝等是什滋味若不知滋味也須細嚼嚼始得

拈古

文殊請佛再轉法輪佛言吾任世四十九年未曾說一字拈云

且道世尊意作麼生復云鐵牛耕破潭底月

宋太宗皇帝問僧看甚麼經僧云仁王經帝云既是寡人經爲甚麼在卿手裏僧無對拈云

一人有慶闔國賴之

昔有道士在殿前背佛而坐僧云道流莫背佛坐士云大德本教云佛身充滿於法界教我向甚麼

處坐卽得拈云

者僧若是個伶俐漢當時待他恁麼道便坐在道士頭上士若言坐但向伊道佛身充滿於法界教我向甚處坐卽得

南泉問座主講得甚麼經主云彌勒經泉云彌勒什麼時下生主云現在天宮未來泉云天上無彌勒地下無彌勒拈云

融道人卽不然天上也是彌勒地下也是彌勒到處總是彌勒不知時人作麼生會

初祖至梁國武帝問朕造寺度僧有何功德祖云

實無功德帝曰如何是第一義諦祖云廓然無聖帝曰對朕者誰祖云不識帝不領悟祖遂渡江至魏拈云

一箇懷藏至寶罕遇識者一箇是說藥人真藥現前尤不能識噫

文喜禪師問文殊此間佛法如何住持殊曰龍蛇混雜凡聖同居喜曰多少衆殊云前三三後三三拈云

者箇公案商量者旣多錯會者不少融道人今日與迷人下箇註脚三箇三三一担擔逢人不得錯舉

湖南祇林每叱文殊普賢皆爲精魅手持木劍自謂降魔纔有僧叅便云魔來也魔來也以劍亂揮潛入方丈如是十二年後置劍無言有僧問十二年前爲甚麼降魔林云賊不打貧兒家僧曰十二年後爲甚不降魔林云賊不打貧兒家拈云好一箇難得的祇林只謂用盡自己心不知笑破他

人口

馮山祐禪師問雲巖承聞汝在藥山是否巖云是祐云藥山大人相作麼生巖云涅槃後有祐云如何是涅槃後有巖云水灑不着巖却問馮山未審

百丈大人相如何山云巍巍堂堂煒煒煌煌聲前非聲色後非色蚊子上鐵牛無你下口處拈云養子不若父家門一世衰雲巖當時待馮山道蚊子上鐵牛無你下口處便與他一喝若下得者一喝馮山只得瓦解冰消

槃山示衆云向上一路千聖不傳學者勞形如猿捉影慈明云向上一路千聖不然天童傑云向上一路掘地覓天拈云

師畫佛半○○○若向者裡會得方可持論其或未
然不堪共語雖然如是融道人不妨另開方便旁通

一線山云向上一路千聖不傳師云向上一路千聖
的傳明云向上一路千聖不然師云向上一路千聖
皆然傑云向上一路掘地覓天師云向上一路普徧
大千且道與古人相去多少

殃焮摩羅值婦產難拈云

世尊如善射之人無法不中殃焮摩羅傳言送語有
甚了期長者大似買石得雲饒

頌古

值婦產難頌云

莫測風雲起老龍世界到處承雷蒙忽逢木馬潭中

過蹋出金烏半夜紅

乾闥婆王奏樂迦葉起舞頌云

雲出岫兮無心月印江兮非意直饒雲月如然也是

一場特地

女子出定頌云

清風吹動釣魚船鼓起澄江浪潑天蒼龍出水翻筋

斗驚的漁人命不全

七賢聖女頌云

無根樹子枝頭動山谷無聲人任安陰陽難到竒特
地開花結子任君觀

布袋和尚頌云

分身百億老長汀入郾垂手接知音高着眼莫粗心
此回錯過實難尋

南嶽思大師頌云

坐斷千差不露痕傳言逸語不堪論無端惹得山蠻
令佛與衆生一口吞

七處徵心頌云

信手拈來用最親一回拈出一回新會後不必頻頻
舉八兩分明是半觔

八還辨見頌云

八還辨見意最親計窮忘盡始歸真不因西嶠殘水
盡怎得東山一帶春

阿難問迦葉頌云

莫謂迦葉太瞞預月照千山夜色寒倒却門前刹竿
着世上迷徒仔細看

達磨至梁國頌云

竺乾美翠一枝花見者愛要人盡誇猛風吹到支那
地打頭遇着刻舟家

二祖求法頌云

尋常惜子恨不來及至子來懶話陪不是可師爲法

切管取渠儂空徃回

六祖得法頌云

會遇師資元有由語中玄妙暗相投衲僧七百皆英
俊獨許盧能出一頭

風旛非動頌云

片雲爲雨下山頭潤濕群萌徧九州從此於中消息
露松風江月正悠悠

六祖不會佛法頌云

圓明覺照絕念時更無一物可堪爲不知不會超岐
路妙體深玄不在斯

六祖云吾有一物非青黃赤白汝等喚作甚麼頌
云

恠哉恠哉真恠哉飄飄仙子下瑤堦直爲渠儂遭跨
下引得玉女笑滿腮

不落階級頌云

迴超今古類難齊佛祖無因識得伊無影樹下休要
坐摩訶般若波羅蜜

離四句絕百非頌云

四句離未爲奇百非絕較些些者僧元無收燕手來
徃奔波空自嗟

密庵傑破沙盆頌云

者箇破沙盆多劫用不盡智者難酬價愚流焉有分

首山竹篋頌云

首山竹篋太無端引得盲者落二三伶俐僧却奪

過劈面相呈會也麼

忠國師無縫塔頌云

巍巍峭峻迴雲霄卓破虛空勢轉遙坐斷千差沒朕

跡幾多描邈不能超

百丈三日耳聾頌云

石牛吐出三春霧靈雀不棲無影樹空中一聲霹靂

響洪雨盆傾徧地注

百丈野狐頌云

携手相將過海東使船全在把稍翁無端觸碎珊瑚

樹獨露清光宇宙中

一物卽不中頌云

說似一物卽不中八年方契賣柴翁全體大用頭頭

顯潛修密證祖佛同

鶴林無棲泊處頌云

玉磚高舉扣金門引出珊瑚價難論莫謂僧來渠不

着佛祖猶是眼中塵

破竈墮爲竈神說法頌二云

聖從何來靈何起認着泥瓦當自己棒下機關透脫
時瞥然頓證無生理

卽心卽佛非心非佛頌二云

跳出離微是非關橫身物外任安閑莫將是非來辨
我一任黃河九曲灣

虛空爲鼓須彌爲槌頌二云

虛空爲鼓須彌槌要打便打休問誰我不說人不曉
卓爾難將正眼窺

向上一路千聖不傳頌二云

千聖不傳本非怪恐隨流水到人間無端石人得其
意一拳擊碎祖師關

烏曰禪師被僧奪棒打頌二云

大鵬無伴過天池獅子將兒絕後隨紫氣夜隨丹鳳
轉金龍纏倒月中枝

亮座主隱跡西山頌二云

多年錯認心講論馬祖指點悟真空自從松聲來有
韻長憶溪水去無踪

泥牛鬪入海頌二云

泥牛入海絕消息衆人爭勝賽擒騎欲窮滄浪溪深

處聽取漁家輒莫迷

瀉山踢倒淨瓶頌云

善用機要是大瀉元老非比類難齊如今不紹家私者休向瓶邊覓是非

大唐國裏無禪師頌云

滿目觀來無知己摩尼如意誰辨真少遇作家穿耳客多逢頑愚刻舟人

普化明頭來明頭打頌云

門頭戶尾事千差箭鋒相拄豈歪斜撒手到家何所有琉璃寶殿鎖蟾華

庭前栢樹子頌云

波原水也水原波人問西來栢指他自從舞得三臺後拍拍元來總是歌

雜錄

康熙壬寅年過都京掃 月心笑祖塔

師拈拄杖指塔云大衆還知笑祖端的麼曾言本來眞父母佛眼覷不見今遠孫又不恁麼若人問融本來眞父母見不見直向伊道九九八十一大衆且道是同是異若人苟能甄別管取平步丹霄遂上香

戊申冬過嘉興府如如菴掃

萬如法祖齒髮塔上供拈香云

法祖法祖法裔廣盛惟融嫡孫不在其數爲甚不在其數若在其數堪作什麼別外分枝橫列派普天涯遍潤枯槁遂上香

和密雲悟祖題京口金山寺詩韻

萬里江心獨出頭撐天一柱砥中流名雄千古遊無倦斜日高歌駕客舟

附原韻

波中卓出始昂頭裂破長江兩道流隔岸紅塵飛不到三三兩兩度人舟

辛丑年師在廣寧普慈寺出示邪教檄文

夫東土從古已來儒釋道三教爲正除三之外悉是邪人不依正理自作幾篇俗話造些妖言異句惑亂癡騃無智又盜竊佛門經偈語錄採集成章一人傳虛萬人傳實騙哄愚迷墮險落難只圖一時龜毛之小利豈顧萬劫地獄之深坑此貪竄之流識者旁觀真可憐愍真可憐愍

又出經首八字以難魔徒而魔衆默不能對師復頌云

以字不是八不成雄才世智那能評聰明波旬尤未

曉造次魔子豈知名

答徐可勗見寄佳什兼次風字韻

撥破太虛空方顯丈夫雄時人知恩少斷臂雪尚紅
憶昔東海上遙望蓬萊宮獨誇獅子步八面不通風

示捷貫書記

竿頭絲線汝須收遇海逢江漫下鈎直到毘盧峰頂
上解開纜放濟人舟

行實

順治戊戌師住廣寧閭山大觀音院一日兩序領衆
啓請敘說行實師云所謂行實者古人年尊德邁履

踐幽微或自說以警後裔或記錄以垂龜鑑融乃臘
輕德薄操守荒疎况恃怙早亡未攻文墨奚以當言
行實哉衆曰和尚過遜也古旣如是今乃亦然如不
親聞焉知往事師含笑曰是汝等好事非我過也遂
云某非異鄉人也卽此遼左蓋州王氏子父諱有賢
母蘇氏昆季二人獨某幼時見僧而喜母常嘆曰吾
家有一善根也卅歲時遊戲山前忽然心中生疑意
謂此山依地而有地依虛空虛空以何爲依耶比時
雖頑稚遂動出家之想不期十一歲時先君早逝十
五又母亡一時家產蕩盡得依外祖恩撫至十九屢

遭離亂決意出家投寧遠西關白衣菴正印老宿雍
髮明年遂行脚二十二至京師授愍忠寺太虛和尚
戒後禮蓮華菴教宗禪師請問本分事宗曰汝且去
叅念佛的是誰當時領此話頭尋止京西龍虎峴住
靜將此話頭橫在胸中晝叅夜叅如癡若騃直得忘
餐廢寢東西莫辨一日小解忽覩溝中蠓虫倍起疑
情念曰此等衆生形質雖微佛性若何沉吟既久豁
然有省便述偈曰剖破微塵得大經渠儂提起越功
勳吾今打開分明說世上逃流那曉聞二十四歲至
金陵古林菴發心作務擔柴運水勞力身染重疾後

病愈又往姑蘇堯峰山叅林臯和尚問燈燈相續意
旨如何臯云你叅去某云者老漢話頭也不識便出
方丈臯次日入堂問曰世尊拈花迦葉微笑其意如
何某云買金遇着賣金人臯云不是者個道理某云
和尚也不得壓良爲賤臯休去後叅顯聖爾密和尚
問根本卽不問差別請師明密云旣會根本差別不
消說得某云實不明望師指示密云于江有水于江
月于江之月一月攝某云覓一月尚不可得說甚于
江之月密笑云向你道不須說密一日陞座某問衆
手淘金誰是得者密云罕遇其人某舉坐具云者個

機述
甞密云你道看云某甲不道且要和尚疑着密云靠老僧作麼又叅廣孝具德和尚問近離甚處某云顯聖德云去年那邊住曰徑山德云徑山顯聖俱落死水何不到天童去曰天童與廣孝有何差別德云徑山顯聖甚靜天童太鬧我者裡總不恁麼某云若然也不得放過德云你一向作麼工夫曰騎牛不覓牛德云汝被理所縛也某云和尚又如何德云豈不聞德山入門便棒臨濟入門便喝汝爲甚坐在此某云德山臨濟意旨如何德便喝某遂禮謝又叅金明若水禪師問向在那邊住過曰去冬顯聖分春廣孝水


舉如意云顯聖廣孝還有者個麼曰盡法界一個無水云喚着則觸不喚着則背汝作麼生某一喝便出隨令侍者畱住水一日講金剛經令衆逐節作頌有同叅請某頌某辭不已爲衆頌世尊敷座云世尊敷座空生看破個事若何飯是米做水見甚喜判云句意俱妥又問空生看破的眼在甚麼處某云盡法界是空生一隻眼又令頌所謂佛法卽非佛法頌云嗅着則觸不嗅則背觸背俱離非貴非賤又令下五位君臣頌語頌云學道先須識自宗某云向外馳求了也頌云莫將實際雜頑空某云我執不除頌云妙

明體盡知傷觸某云賊人心虛頌云力在逢緣不借
中着云本無內外說甚麼中頌云出語直教燒不着
某云也須仔細眉毛頌云潛行須與古人同着云是
甚所在說古道今頌云無身有事超岐路着云咄又
恁麼去也頌云無事無身落始終某云情知你放不
下又叅報恩玉林和尚問逆碎虛空時如何林云你
在那裡站立某拂坐具歸衆林便喝林一日上堂某
問臨濟道第一句薦得堪與佛祖爲師卽今國裡還
有個巴也無林云有某云卽今在甚麼處林云舉眼
便見某云馬將軍旗前撫掌林一日掛牌令衆作本

來面目頌某頌云填溝塞壑滿虛空無限群靈在此
中自從金鎖玄關碎寶藏元來用無窮林印可之金
粟叅費隱和尚遂問和尚以何法爲人費云山僧只
有一條拄杖子某云看破者老漢了也費捉住云你
見個甚麼道理便恁麼道某云不妨疑着費打某便
喝費云念汝遠來且坐喫茶某云是何言語又一日
問某堂前露柱懷胎是男是女某云也不是男也不
是女費打云是甚麼某云描也描不就画也画不成
費云亂道某喝云者老漢是何心行費喝某亦喝遂
拂袖而出至堯村叅浮石和尚問石而能浮承誰恩


擬述
力石云進前來向汝道某進前便喝石云再喝一喝
看曰和尚喚作喝那石云汝又作麼生某一喝遂拂
袖出又端午日上堂某問端午陞座卽不問二人相
戰必定是那一個得勝石震威一喝某遂作禮石云
放汝三十棒某起以坐具向座上作劈勢石便休自
是歷遍諸方叅尋知識後轉都門普濟菴遇本師和
尚開堂命典知藏師上堂曰某出問濟宗爐鞴都京
重開四海英靈咸集此會和尚如何煨煉師打云一
棒一條痕融云莫便是和尚爲人處麼師云闍黎還
薦取麼融云頂門具眼方堪曉耀古騰今達者知師

便喝融云萬煨爐中鐵蒺藜佛祖當塗不讓伊師云
好個消息某禮謝歸衆其後將古機緣警訛公案一
一舉出命衆拈頌某便拈頌甚愜本師之意遂將源
流衣拂拄杖一并付囑可爲祖禰不了殃及兒孫這
便是融上座半生行脚今被諸公苦逼不覺失口道
出倘有個漢也似山僧這般鈍置正好三十拄杖趁
出久立珍重



樂述

秀...
郎...
本...



世十八

